

Kesheni na Kuomba,

Angalieni, kesheni, [ombeni], kwa kuwa hamjui wakati ule utakapokuwapo.
Marko 13:33.

“Angalieni, kesheni, ombeni” haya yalikuwa maneno ya Mwokozi wetu aliyonena akiurejelea wakati wa mwisho na ujio Wake wa mara ya pili kuwachukua watoto Wake waaminifu na kuwapeleka nyumbani.

Kwanza, mnatakiwa kukesha. Kesheni, msije mkaongea kwa hamaki, kwa woga na bila subira. Kesheni, kiburi kisije kikapata nafasi mioyoni mwenu. Kesheni, tamaa mbaya isije ikawashinda, badala ya kuitiisha. Kesheni, ili roho ya uzembe na kutojali zisije kuja juu yenu na kuwafanya kutojali wajibu wenu na kuwa dhaifu na wasio na mvuto wenu kuelekeza kwenye kifo badala ya uzima.

Pili, mnatakiwa kuomba. Yesu asingewaamuru ninyi kulifanya hili, isipokuwa kama kuna haja thabiti ya kuomba. Anafahamu vyema kwamba peke yenu hamwezi kushinda majaribu ya adui na mitego mingi iliyowekwa kwa ajili ya miguu yenu. Hajawaacha peke yenu kufanya hivyo; bali ameweka njia ili muweze kupata msaada. Hivyo anawasihi muombe.

Kuomba sawasawa ni kumsihi Mungu kwa imani kwa ajili ya vitu vile unavyovihitaji. Nenda katika chumba chako cha siri au katika maeneo ya kimya na kumsihi Baba yako kukupa msaada kwa ajili ya Kristo. Kuna nguvu katika ombi hilo lililotumwa mbinguni kutoka katika moyo uliosadikishwa na udhaifu wake binafsi, lakini ukiwa na shauku ya dhati kupata nguvu itokayo kwa Mungu. Ombi la dhati lililoombwa kwa bidii litasikiwa na kujibiwa. Nenda kwa Mungu wako mwenye nguvu, anayependa kusikia maombi ya watoto Wake, japo utajisikia kuwa mdhaifu sana na kwa wakati fulani kujihisi kama adui amekushinda, kwa sababu haujatunza amri ya kwanza ya Mwokozi, kukesha, bado usikate tamaa katika pambano. Weka juhudi zaidi kuliko zile za awali. Usizimie. Jitupe chini ya miguu ya Yesu, ambaye aliyejaribiwa, na anayejua jinsi ya kuwasaidia wale wanaojaribiwa kama ambavyo Yeye alijaribiwa. Ungama makosa yako, udhaifu wako na kuomba kusaidiwa kuyashinda la si hivyo utaangamia. Wakati unapoomba, unapaswa kuamini kwamba Mungu anakusikia... Mungu atakusaidia. Malaika watakulinda.

Lakini kabla haujatarajia msaada huu, unapaswa kufanya kile uwezacho kwa nafasi yako. Kesheni na kuomba. Maombi yako yawe ya bidii. Ruhusu kauli hii kuwa moyoni mwako, “Sikuachi, usiponibariki.” Tenga muda wako, wakati mzuri wa maombi angalau mara tatu kwa siku. Asubuhi, mchana na usiku. Danieli aliomba kwa Mungu wake, bila kujali marufuku ya mfalme wala kuogopa tundu la simba. Hakuona aibu wala kuogopa kuomba kwa Mungu, akiwa amefungua madirisha ya nyumba yake aliomba mara tatu kwa siku. Je, Mungu alimsahau mtumishi Wake mwaminifu pale alipotupwa katika tundu la simba? Hapana. Alikuwa pamoja naye usiku mzima. Alifunga makanwa ya simba wenye njaa na hawakumdhuru mtu wa Mungu mwombaji (**Youth's Instructor, Oktoba 1, 1855**).